

Općinski načelnik mr Ibrahim Hadžibajrić
Pozdravno obraćanje sudionicima konferencije

Poštovani dame i gospodo,

cijenjeni organizatori i sudionici Sedme internacionalne konferencije Sarajevo i svijet, čast mi je u svojstvu načelnika Općine Stari Grad Sarajevo pozdraviti vas i zaželjeti vam uspjeh u radu. Želio bih naglasiti da sam i osobno i u svojstvu načelnika općine Stari Grad Sarajevo uključen u inicijativu da svake godine u maju organiziramo okupljanje naučnika i javnih radnika iz zemlje i svijeta radi preispitivanja naših razumijevanja mjesta i uloge Sarajeva u političkim, kulturnim i ekonomskim odnosima prema bosanskohercegovačkom društvu i njegovoj državi, a tako i prema svijetu kao cjelini.

Nije teško pokazati da je Sarajevo u svom dugom trajanju središte svega bosanskog u najljepšim i najboljim značenjima bosanskog ideala – uspostaviti, održavati i razvijati pluralno društvo u skladu s najboljim interesima svih njegovih članova. Ali, taj ideal je u etnonacionalističkim programima porican, nerijetko i silom razaran. Iako je Sarajevo u dugome vremenu bilo grad sa značenjem geopolitičkog središta – koje je utjecalo i izvan sadašnjih bosanskohercegovačkih granica – tek u novijim vremenima, a to znači prije svega u prvoj polovini dvadesetoga vijeka, takav njegov položaj je okrutno i razorno osporen. Grad je u tome vremenu zapušten, a bosanskohercegovačko društvo i njegovi politički ideali razdirani su između dva etnonacijska središta.

Dio te historijske dinamike je i posljednji rat protiv bosanskohercegovačkog društva i njegove države, u kojem je Sarajevu nametnuta smrtonosna opsada. Opsadnici, a zapravo zločinci, očekivali su da u gradu nema i ne može biti snage koja će se tome oduprijeti. Bogu hvala, pogriješili su. Snagom čiji temelj je ljubav prema Sarajevu i svemu čemu je ono središte, snagom i ljubavi za slobodu i dostojanstven život, ovaj grad je obranjen pred očima cijeloga svijeta. Tako su otvoreni putevi prema realiziranju bosanskog ideala slobodnog društva u kojem su njegovi pojedinci odgovorni za svoju budućnost.

Rehabilitacija svijesti o ideji i idealu Sarajeva kao središta svega bosanskog pretpostavlja, pored ostalog, pet bitnih sadržaja. Prvi, Sarajevo u svojoj ukupnosti jest jedinstven grad te neodvojiv od bosanskohercegovačke društvene i historijske cjeline. Drugi, iako je razvijano uzduž od svoje historijske jezgre, a to znači od Bašćaršije, prema Ilidži i dalje, te organizirano u više općina, to je cjelovito urbano tkivo kojem je u budućnosti potrebno osigurati razvojnu integraciju u svim smjerovima. Treći, historijska i simbolička jezgra Sarajeva, sadašnja općina Stari Grad Sarajevo, u kojoj su koncentrirani najvažniji spomenici bosanske kulture, mora biti poštovana, šticeana i predstavljana kao javno dobro najvišeg reda s kojim se svi bosanskohercegovački ljudi, u zemlji i svijetu, mogu ponositi kao svojim neotuđivim blagom. Četvrti, u dugo vremena zapuštan, razarane i zaboravljane vrijednosti te urbane jezgre Sarajeva nužno je vratiti odgovarajuće sadržaje, ali izgraditi i nove u skladu s civilizacijskim razvojem svijeta i mjestom bosanskohercegovačke politike, kulture i ekonomije, tako da Stari Grad Sarajevo, Bašćaršija bude politička, kulturna i ekonomska matica koja zrači i proizvodi, privlači i daje te ohrabruje i podstiče. I peti sadržaj, Sarajevo se tiče prije svega nas, njegovih građana, i svih bosanskohercegovačkih ljudi, i onih koji su ovdje i onih koji su se davno ili nedavno iselili, ali i svijeta kao cjeline, jer ideal religijski pluralnog društva, što jest bitan sadržaj cijele naše historije, danas se više nego ikada ranije pokazuje kao princip na kojem počiva svijet slobodnih demokracija i poštovanje ljudskih prava.

Meni je čast i zadovoljstvo da mi je organizator omogućio da vam se obratim. Znam da će vaša izlaganja i rasprave biti dostupni velikom broju zainteresiranih u svijetu. Odluka

organizatora da ni ovu ni prošlu godinu, u kojima svijet trpi pandemijsku opsadu, ne propusti već da u skladu s izvornom namjerom nastavi okupljati naučnike i druge javne radnike, zavrjeđuje i priznanje i poštovanje. Zato svima vama u ime Općine Stari Grad Sarajevo želim iskazati iskreno poštovanje te vas zamoliti da svojim prijedlozima i rezultatima idalje doprinosite realiziranju velikog ideala Sarajeva.

Naglašavam da nema uspješnih demokracija bez uspješnih gradova u kojima se njihovi stanovnici okupljaju s osjećanjem odgovornosti za sve što se tu događa, bez poduzetništva u svim područjima života i od njeg neodvojivog dinamičnog civilnog društva, te bez snaženja moralne odgovornosti jednih prema drugim i prema cjelini života. Kako vidim, pet raspravnih stolova ove konferencije artikulirano je tako da obuhvati brojne sadržaje života u politici, kulturi i ekonomiji, koji nerijetko izmiču iz vidika političkog pragmatizma. Ovu konferenciju, kao i prethodne i buduće, vidim kao snaženje upravo tog što nam kao novo osvješćenje svega sarajevskog i svega bosanskog treba koliko i zrak, i voda, i hljeb.

Još jednom vas srdačno pozdravljam i želim uspješan rad.